

AKTA UNIVERSITI DAN KOLEJ UNIVERSITI 1971  
PERLEMBAGAAN UNIVERSITI MALAYA 1997

KAEDAH-KAEDAH UNIVERSITI MALAYA  
(IJAZAH DOKTOR FALSAFAH) 2007

SUSUNAN KAEDAH

BAHAGIAN 1  
PERMULAAN

Kaedah

1. Nama, mula berkuat kuasa dan pemakaian
2. Tafsiran

BAHAGIAN II  
PROGRAM PENGAJIAN DAN SYARAT KEMASUKAN

3. Program pengajian
4. Syarat kemasukan

BAHAGIAN III  
PENDAFTARAN

5. Pendaftaran sebagai calon

BAHAGIAN IV  
BAYARAN

6. Yuran dan bayaran lain
7. Hak mengubah kadar yuran dan bayaran lain

BAHAGIAN V  
TEMPOH PROGRAM PENGAJIAN

8. Tempoh program pengajian
9. Tempoh minimum dan tempoh maksimum

BAHAGIAN VI  
STRUKTUR PROGRAM PENGAJIAN

10. Struktur program pengajian

**BAHAGIAN VII  
SYARAT BAHASA**

- 11. Syarat bahasa Malaysia
- 12. Syarat bahasa Inggeris

**BAHAGIAN VIII  
PEPERIKSAAN**

- 13. Peperiksaan

**BAHAGIAN IX  
PENGIJAZAHAN**

- 14. Syarat pengijazahan

**BAHAGIAN X  
AM**

- 15. Kemasukan pelajar pemerhati
- 16. Penamatan pencalonan
- 17. Kuasa Senat membuat peraturan
- 18. Pengecualian pemakaian
- 19. Pematuhan statut, kaedah-kaedah dan peraturan-peraturan Universiti
- 20. Pembatalan

AKTA UNIVERSITI DAN KOLEJ UNIVERSITI 1971  
PERLEMBAGAAN UNIVERSITI MALAYA 1997

KaedaH-Kaedah Universiti Malaya  
(Ijazah Doktor Falsafah) 2007

PADA menjalankan kuasa yang diberi oleh seksyen 31 dan subseksyen 32(1) Perlembagaan Universiti Malaya 1997 [P.U. (A) 107], Lembaga Pengarah Universiti membuat kaedah-kaedah berikut:

BAHAGIAN I

PERMULAAN

**Nama, mula berkuat kuasa dan pemakaian**

1. (1) Kaedah-Kaedah ini bolehlah dinamakan **Kaedah-Kaedah Universiti Malaya (Ijazah Doktor Falsafah) 2007** dan hendaklah berkuat kuasa mulai sesi akademik 2007/2008.

(2) Kaedah-kaedah ini hendaklah terpakai kepada semua calon program pengajian ijazah Doktor Falsafah yang diterima masuk sebelum dan pada sesi akademik 2007/2008 dan selepas itu.

**Tafsiran**

2. Kaedah-Kaedah ini, melainkan jika konteks menghendaki makna yang lain—  
“bilik peperiksaan” ertinya premis untuk menjalankan peperiksaan bagi sesuatu kursus atau kursus-kursus;

“calon” ertinya seseorang yang telah berdaftar bagi menjalani program pengajian ijazah Doktor Falsafah;

“Dekan Fakulti” ertinya Dekan Fakulti Universiti dan termasuk mana-mana Pengarah atau Ketua Akademi, Pusat, Sekolah atau Institut yang dilantik di bawah subseksyen 21(4) dan (5) Perlembagaan;

“Fakulti” ertinya mana-mana Fakulti Universiti dan termasuk mana-mana Sekolah, Pusat, Akademi dan Institut Universiti yang ditubuhkan di bawah subseksyen 21(1) Perlembagaan;

“Ijazah” ertinya ijazah Doktor Falsafah Universiti;

“Jabatan” ertinya mana-mana jabatan pengajian Fakulti dan termasuk mana-mana bahagian pengajian Fakulti;

"Jawatankuasa Pemeriksa" ertinya jawatankuasa yang ditubuhkan di setiap Fakulti untuk maksud menimbang dan menilai keputusan peperiksaan calon sepetimana yang diperuntukkan dalam peraturan-peraturan kepada Kaedah-Kaedah ini;

"Ketua Jabatan" ertinya Ketua mana-mana Jabatan pengajian Fakulti termasuk Pengerusi mana-mana bahagian pengajian Fakulti atau Penyelaras Program di mana berkenaan;

"kursus" ertinya satu unit pengajian atau latihan yang dijalankan sepanjang satu tempoh yang ditetapkan;

"laporan penyelidikan" ertinya hasil penyelidikan yang telah dijalankan oleh calon semasa pencalonannya, dan termasuk kertas penyelidikan, kertas projek, laporan projek dan hasil penyelidikan berkenaan yang dikenali dengan apa-apa juga nama;

"Naib Canselor" ertinya ketua pegawai eksekutif dan akademik Universiti yang dilantik di bawah subseksyen 12(1) Perlembagaan;

"pemeriksa dalam" ertinya seseorang guru sepenuh masa atau separuh masa Universiti yang dilantik oleh Fakulti untuk memeriksa sesuatu kursus, sebahagian daripada kursus itu atau tesis calon;

"pemeriksa luar" ertinya seseorang bukan guru sepenuh masa atau separuh masa Universiti yang dilantik oleh Senat untuk memeriksa kursus program pengajian Ijazah atau tesis calon;

"Pendaftar" ertinya seorang pegawai Universiti seperti mana yang diperuntukkan di bawah subseksyen 13(1) Perlembagaan;

"pengawas" ertinya pengawas dan termasuk ketua pengawas yang dilantik oleh Naib Canselor daripada kalangan guru sepenuh masa Universiti untuk mengawas peperiksaan program pengajian Ijazah;

"penyelia" ertinya seseorang yang dilantik oleh Fakulti daripada kalangan kakitangan akademik Universiti dan termasuk Profesor Emeritus Universiti, Profesor Adjung Universiti, penyelidik pasca-doktoral atau felo penyelidik untuk menyelia calon dalam program pengajiannya;

"penyelia bersama" ertinya seseorang yang dilantik oleh Fakulti daripada kalangan kakitangan akademik yang telah meninggalkan perkhidmatan Universiti di mana khidmat seliaannya masih diperlukan untuk membantu calonnya menyempurnakan program pengajian dan boleh termasuk kakitangan akademik dari universiti lain yang dilantik;

"Perlembagaan" ertinya Perlembagaan Universiti Malaya;

"perunding" ertinya seseorang yang bukan kakitangan akademik mana-mana universiti yang dilantik oleh Fakulti untuk membantu dalam penyeliaan calon dalam program pengajiannya;

"program pengajian" ertinya kumpulan-kumpulan kursus, latihan dan penyelidikan atau gabungan kursus, latihan dan penyelidikan yang dirancang dan ditawarkan bagi memenuhi keperluan untuk anugerah ijazah;

"program pengajian secara Kursus dan Penyelidikan" ertinya program pengajian yang ditakrifkan di bawah perenggan 3(b);

"program pengajian secara Penyelidikan" ertinya program pengajian yang ditakrifkan di bawah perenggan 3(a);

"semester" ertinya tempoh tertentu di dalam sesuatu sesi akademik dan terdiri daripada semester biasa dan semester khas;

"semester biasa" ertinya Semester I atau Semester II sepetimana yang dinyatakan dalam Jadual Semester;

"Senat" ertinya salah satu Pihak Berkuasa Universiti yang ditubuhkan di bawah subseksyen 20(1) Perlembagaan;

"sesi akademik" ertinya tempoh pengajian sesuatu program pengajian yang terdiri daripada dua semester biasa termasuk semester khas;

"tahun akademik" ertinya tempoh dua belas bulan yang tarikh permulaan dan tarikh akhirnya hendaklah seperti mana yang ditetapkan oleh Universiti;

"tahun kalendar" ertinya jangka waktu (masa) yang tempohnya adalah dua belas bulan;

"tempat pengajian" ertinya Universiti termasuk mana-mana tempat lain yang diluluskan oleh Universiti;

"tesis" ertinya suatu hasil bertulis dari penyelidikan yang telah dijalankan berkaitan dengan program pengajian Ijazah;

"Universiti" ertinya Universiti Malaya.

## BAHAGIAN II PROGRAM PENGAJIAN DAN SYARAT KEMASUKAN

### **Program pengajian**

3. Program pengajian hendaklah diklasifikasikan seperti berikut:

- (a) Ijazah Doktor Falsafah secara Penyelidikan, iaitu program pengajian yang dilaksanakan secara penyelidikan sepenuhnya yang membawa kepada penghasilan tesis; dan

- (b) Ijazah Doktor Falsafah secara Kursus dan Penyelidikan, iaitu program pengajian yang dilaksanakan secara gabungan perkuliahan dan penyelidikan melainkan kebenaran bertulis telah diperoleh terlebih dahulu, calon hendaklah menjalankan penyelidikan setelah ia berjaya menyempurnakan semua perkuliahan yang ditetapkan dalam kurikulum program pengajian yang membawa kepada penghasilan tesis.

### **Syarat kemasukan**

4. (1) Kelayakan minimum bagi kemasukan ke program pengajian Ijazah hendaklah seperti berikut:

- (a) Ijazah Sarjana; atau
- (b) Ijazah Sarjana Muda Perubatan atau Pergigian; serta menunjukkan bukti yang mencukupi tentang latihan dan keupayaan untuk mengikuti program pengajian Ijazah.

(2) Walau apapun peruntukan dalam perenggan (1)(a) dan (b), dalam keskes yang tertentu dan tertakluk kepada kelulusan Senat, Fakulti boleh diberi kelonggaran untuk menerima calon yang mempunyai kelayakan selain daripada yang terkandung dalam syarat kemasukan yang sedia ada.

(3) Walau apapun yang diperuntukkan oleh subkaedah (1) dan (2), Universiti boleh mempertimbangkan untuk menerima masuk ke program pengajian Ijazah seseorang yang mempunyai kelayakan ijazah Sarjana Muda yang cemerlang (PNGK 3.7 dan ke atas atau yang setaraf dengannya), tertakluk kepada kemajuan pengajiannya akan dipantau dan calon dikehendaki membentangkan kemajuan penyelidikannya dalam satu seminar dalam tempoh—

- (a) dua semester dari tarikh pendaftarannya, bagi program pengajian Ijazah secara Penyelidikan; atau
- (b) empat semester dari tarikh pendaftarannya, bagi program pengajian Ijazah secara Kursus dan Penyelidikan.

(4) Sekiranya kemajuan pengajiannya memuaskan, calon boleh dibenarkan untuk meneruskan pencalonannya sebagai calon Ijazah, tetapi sekiranya kemajuan pengajiannya tidak memuaskan, status pencalonannya ditukarkan kepada ijazah Sarjana yang berkenaan.

(5) Kemasukan seseorang calon hendaklah atas budi bicara Fakulti. Walau bagaimanapun dalam keadaan-keadaan tertentu Dekan Fakulti boleh, atas perakuan Timbalan Dekan yang bertanggungjawab bagi urusan program pascasiswazah dan Ketua Jabatan berkenaan, menerima masuk seseorang yang memenuhi kelayakan berikut:

- (a) Ijazah Sarjana Muda dalam bidang berkaitan dan PNGKnya tidak kurang daripada 3.0 (atau setaraf dengannya); dan

- (b) Ijazah Sarjana Dengan Cemerlang dalam bidang berkaitan atau ijazah Sarjana dengan PNGK tidak kurang daripada 3.0 (atau setaraf dengannya) mengikut yang mana berkaitan.

### BAHAGIAN III PENDAFTARAN

#### **Pendaftaran sebagai calon**

5. (1) Sesiapa yang ditawarkan oleh Universiti untuk mengikuti program pengajian Ijazah dan menerima tawaran tersebut dikehendaki mendaftar mengikut peraturan di bawah Peraturan-Peraturan Universiti Malaya (Ijazah Doktor Falsafah) 2007.

(2) Tertakluk kepada subkaedah (3), sesiapa yang mendaftar seperti yang tersebut di subkaedah (1) adalah pelajar Universiti dan digelar calon program pengajian Ijazah. Nama calon tersebut hendaklah disenaraikan dalam daftar pelajar Universiti sehingga calon berjaya menamatkan program pengajiannya dan Senat mengesahkan calon tersebut layak dianugerahkan Ijazah atau sehingga atas sebab tertentu calon tersebut hilang status menjadi pelajar Universiti mengikut yang mana terdahulu.

(3) Setiap calon yang telah mendaftar untuk program pengajian yang telah ditawarkan kepadanya hendaklah mendaftar secara berterusan dengan Universiti.

(4) Mana-mana calon yang gagal mendaftar secara berterusan dengan Universiti akan terhenti daripada menjadi pelajar dan namanya akan digugurkan daripada senarai daftar pelajar Universiti.

(5) Walau apapun yang dinyatakan oleh subkaedah (1) dan tertakluk kepada subkaedah (3), Senat boleh pada bila-bila masa menamatkan pendaftaran mana-mana calon sekiranya pada pandangan Senat calon tersebut atas sebab-sebab akademik yang ditentukan oleh Senat, tidak mampu meneruskan program pengajiannya dan nama calon tersebut hendaklah digugurkan dari senarai daftar pelajar Universiti dan calon tersebut hendaklah terhenti daripada menjadi pelajar Universiti.

### BAHAGIAN IV BAYARAN

#### **Yuran dan bayaran lain**

6. Calon hendaklah menjelaskan semua yuran dan bayaran lain yang ditetapkan mengikut peraturan seperimana yang diperuntukkan dalam Peraturan-Peraturan Universiti Malaya (Ijazah Doktor Falsafah) 2007.

## **Hak mengubah kadar yuran dan bayaran lain**

7. Pihak Universiti mempunyai hak mutlak untuk mengubah kadar yuran dan apa-apa kadar bayaran lain yang ditetapkan tanpa notis terlebih dahulu kepada calon.

## **BAHAGIAN V TEMPOH PROGRAM PENGAJIAN**

### **Tempoh program pengajian**

8. Calon hendaklah mengikuti dan menamatkan program pengajiannya dalam tempoh yang ditetapkan.

### **Tempoh minimum dan tempoh maksimum**

9. (1) Tempoh minimum bagi program pengajian Ijazah adalah selama empat semester biasa melainkan Senat meluluskan suatu tempoh yang berlainan.

(2) Tempoh maksimum bagi program pengajian Ijazah adalah selama enam belas semester biasa.

(3) Walau apapun yang dinyatakan dalam subkaedah (1) dan (2) dalam keadaan tertentu Dekan Institut Pengajian Siswazah atau pegawai lain seperti mana yang ditetapkan oleh Universiti boleh melanjutkan tempoh pencalonan yang melampaui tempoh maksimum seperti mana yang ditetapkan dalam subkaedah (2) dengan syarat bahawa pelanjutan berkenaan tidak melebihi tempoh dua semester.

## **BAHAGIAN VI STRUKTUR PROGRAM PENGAJIAN**

### **Struktur program pengajian**

10. (1) Bagi program pengajian Ijazah secara Penyelidikan, calon dikehendaki menjalankan penyelidikan sepenuhnya yang membawa kepada penghasilan tesis. Walau bagaimanapun calon boleh disyaratkan untuk mengikuti kursus-kursus tertentu sebagaimana yang ditetapkan oleh Universiti atau Fakulti yang berkenaan.

(2) Bagi program pengajian Ijazah secara Kursus dan Penyelidikan, calon dikehendaki mengikuti program tersebut berdasarkan struktur program pengajian seperti mana yang ditetapkan dalam Peraturan-Peraturan yang dibuat di bawah Kaedah-Kaedah ini.

## BAHAGIAN VII SYARAT BAHASA

### **Syarat bahasa Malaysia**

11. (1) Calon warganegara Malaysia dikehendaki memperoleh sekurang-kurangnya gred lulus dalam Bahasa Melayu atau Bahasa Malaysia di peringkat Sijil Pelajaran Malaysia atau Peringkat III Sijil Kecekapan Bahasa Malaysia atau Peringkat III Sijil Intensif Bahasa Malaysia Universiti atau di peringkat setaraf dengannya sebelum dianugerahkan Ijazahnya.

(2) Calon bukan warganegara Malaysia dikehendaki menghadiri dengan memuaskan suatu kursus bahasa Malaysia yang dikendalikan oleh Universiti sebelum dianugerahkan Ijazahnya melainkan ia memperoleh sekurang-kurangnya gred lulus dalam Bahasa Melayu atau Bahasa Malaysia di peringkat Sijil Pelajaran Malaysia atau Peringkat III Sijil Kecekapan Bahasa Malaysia atau Peringkat III Sijil Intensif Bahasa Malaysia Universiti atau kursus bahasa Malaysia yang diiktiraf oleh Universiti.

(3) Walau apapun yang diperuntukkan oleh subkaedah (1) dan (2) keperluan syarat bahasa Malaysia adalah dikecualikan bagi calon yang telah mengikuti pengajian dalam bahasa kebangsaan di Institusi Pengajian Tinggi tempatan.

### **Syarat bahasa Inggeris**

12. (1) Calon bukan warganegara Malaysia yang memperoleh ijazahnya atau ijazah-ijazahnya dari universiti atau institusi pengajian tinggi yang tidak menggunakan bahasa Inggeris sebagai bahasa pengantar bagi ijazah atau ijazah-ijazah berkenaan yang ingin menulis tesisnya dalam bahasa Inggeris atau di mana program pengajian Ijazah yang ingin diikutinya dijalankan dalam bahasa Inggeris adalah dikehendaki—

- (a) memperolehi skor sebanyak 550 untuk jumlah berasaskan kertas, skor sebanyak 213 bagi jumlah berasaskan komputer atau skor sebanyak 80 bagi jumlah berasaskan internet bagi *Test of English as a Foreign Language* (TOEFL); atau
- (b) memperolehi band 6 bagi *International English Language Testing System* (IELTS).

(2) Sekiranya calon tidak mempunyai kelayakan yang ditetapkan dalam perenggan (1)(a) dan (b), calon hendaklah menghadiri mana-mana kursus bahasa Inggeris dan lulus mana-mana ujian bahasa Inggeris yang ditetapkan oleh Senat sebelum memulakan penulisan tesisnya.

(3) Walau apapun yang diperuntukkan dalam subkaedah (1) dan (2), Fakulti boleh berdasarkan keperluan program pengajian Ijazah, mengenakan—

- (a) peringkat kecekapan bahasa Inggeris yang lebih tinggi bagi calon bukan warganegara Malaysia;
- (b) peringkat kecekapan bahasa Inggeris yang minimum bagi calon warganegara Malaysia; atau
- (c) syarat minimum bahasa Inggeris sebagai syarat kemasukan ke program pengajian Ijazah.

## BAHAGIAN VIII PEPERIKSAAN

### **Peperiksaan**

13. Peperiksaan hendaklah diadakan bagi program pengajian Ijazah secara—

- (a) Penyelidikan; dan
- (b) Kursus dan Penyelidikan,

yang tertakluk kepada peraturan-peraturan di dalam Peraturan-Peraturan Universiti Malaya (Ijazah Doktor Falsafah) 2007.

## BAHAGIAN IX PENGIJAZAHAN

### **Syarat pengijazahan**

14. Ijazah boleh dianugerahkan kepada calon yang telah—

- (a) memenuhi segala keperluan Kaedah-Kaedah ini dan apa-apa peraturan yang dibuat di bawahnya;
- (b) diputuskan dan diperakukan supaya dikurniakan Ijazah oleh Jawatankuasa Pemeriksa dan diluluskan oleh Senat; dan
- (c) membayar semua yuran dan bayaran lain yang ditetapkan oleh Universiti.

## BAHAGIAN X AM

### **Kemasukan pelajar pemerhati**

15. (1) Pelajar Pemerhati ialah seseorang yang diluluskan untuk mengikuti mana-mana kursus yang ditawarkan bagi program pengajian Ijazah, sama ada atau

tidak untuk tujuan mendapat kredit. Mereka bukanlah pelajar program pengajian Universiti.

(2) Kemasukan pelajar pemerhati hendaklah atas budi bicara Dekan Fakulti.

### **Penamatan pencalonan**

16. Senat berhak menamatkan pencalonan seseorang calon yang didapati telah memberikan maklumat palsu serta tidak benar berkenaan dengan kemasukannya ke Universiti.

### **Kuasa Senat membuat peraturan**

17. Senat boleh membuat peraturan-peraturan pada amnya sebagaimana yang perlu bagi maksud melaksanakan atau menguatkuasakan peruntukan-peruntukan Kaedah-Kaedah ini.

### **Pengecualian pemakaian**

18. Walau apapun dinyatakan di bawah Kaedah ini dan peraturan-peraturan yang dibuat di bawahnya, Senat boleh memberi pengecualian mana-mana peruntukan Kaedah-Kaedah ini.

### **Pematuhan statut, kaedah-kaedah dan peraturan-peraturan Universiti**

19. Setiap calon adalah tertakluk kepada Akta Universiti dan Kolej Universiti 1971, Perlembagaan Universiti Malaya, semua Statut, kaedah-kaedah dan peraturan-peraturan lain yang sedia terpakai di Universiti termasuk Kaedah-Kaedah Universiti Malaya (Tatatertib Pelajar-Pelajar) 1999.

### **Pembatalan**

20. (1) Akta Doktor Falsafah IX dan peraturan-peraturan yang dibuat di bawahnya adalah dengan ini dibatalkan.

(2) Walau apapun yang diperuntukkan dalam subkaedah (1), dan tertakluk kepada pematuhan Akta Doktor Falsafah IX dan peraturan-peraturan yang dibuat di bawahnya, pencalonan seorang calon yang berdaftar di bawah Akta Doktor Falsafah IX dan peraturan-peraturan yang dibuat di bawahnya, hendaklah pada permulaan Kaedah-Kaedah ini terus mempunyai kuasa dan kesan seolah-olah calon itu telah berdaftar di bawah Kaedah-Kaedah ini tetapi selepas itu pencalonan calon itu akan tertakluk kepada Kaedah-Kaedah ini.

Dibuat \_\_\_\_\_

Pengerusi  
Lembaga Pengarah Universiti Malaya

Disemak: 26/1/2008